

## Edizioni

- letto 322 volte

## Cots

I.

Egan, res qu'ieu vis  
no·m det alegrier,  
ni·m plac flors de lis  
ni fruz d'aiglentier;  
ans vau mieg ausis  
de mieg desirier  
e de benvolenza,  
qu'e mala merce  
m'a tengut Amors,  
don mi ven l'esmais  
e la greus dolors.

II.

Be m'a tot aquis  
per son domengier  
Amors, qu'ie·l so fis  
et aman sobrier,  
et estau aclis  
al pejor guerrier,  
qu'ieu ai gran faillenza  
fait, car no·l sove  
dels amoros plors,  
q'era m'es esglais  
zo qe·m fon douzors.

III.

S'els huils abelis  
Amors de primier,  
mas li plor el vis  
e·l douz cossirier  
son al cor assis.  
D'envejos mestier  
no·m par malsabensa,  
qu'ieu am mais de re  
leis don fatz clamors  
e, can non pusc mais,

dic ne deslausors.

IV.

Tant jorn ai enqis,  
per talan leugier,  
q'ieu de leis auzis  
blasm'o reproier,  
mas cil del pais  
son gen vertadier  
de sa captenenza,  
qe so q'il fa be  
l'es grazit e sors,  
et no l'es re frais  
c'a leis si'honors.

V.

D'aitan m'obezis,  
si mais non sofier,  
volgues que-l servis;  
e, si trop liquier  
lo seu gent cors lis  
d'un joi plasentier  
humil, sa valenza  
l'adouzis vas me  
l'orguill; que sabors  
m'es que tot joi lais  
ans que-m vir aillors.

- letto 365 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911  
CF 80209930587 PI 02133771002

---

**Source URL:** <https://letteraturaeuropaea.let.uniroma1.it/?q=laboratorio/edizioni-884>